

欽定剿平粵匪方略

欽定勦平粵匪方略卷四十八 癸丑年

七月初一日 甲辰 琦善陳金綬雷以誠奏言查逆

匪由瓜州進占虹橋意欲從運河直達揚州南  
門十九日該逆由瓜州水路竄入舍舟登陸分  
爲三股直撲三汊河營盤官兵分投迎擊遊擊  
安勇擊斃賊匪無數該逆由南岸遁走都司毛  
三元瞭見賊船由瓜州運河駛入卽督兵沿岸

迎敵轟燬賊船五隻小剝船二隻適侍衛德興  
阿帶領馬隊多名會同安勇黃志配前來策應  
與毛三元合併一處奮力進攻賊始退去近日  
賊匪瓜州與鎮江聯成一氣難保不糾合大股  
以圖復逞據奸細供稱瓜州之賊欲從鎮江來  
揚接應臣琦善已續派瞿騰龍帶兵六百名前  
往三汊河幫同防剿復派副都統薩炳阿馳往

儀徵修築舊港土壩並將新城一帶船隻木簕  
收入僻港免爲賊用至施家橋旱路總匯之區  
臣雷以誠派令五品銜張翊國帶勇前往駐守  
琦善陳金綬雷以誠又奏言查六月二十一日  
浦口南岸賊船二十餘隻駛至北岸停泊寶塔  
根地方武慶當卽會同開隆阿西昌阿伊興額  
帶領官兵迎剿燒燬賊船十餘隻生擒賊匪十

九人落水淹斃者不計其數其餘江面賊船見北岸有備旋即折回南岸又在寶塔根奪獲賊船一隻搜獲賊匪三名內有僞總帥李是占供稱江甯賊首欲分遣賊黨由北岸竄往揚州接應是賊船屢次窺伺北岸其爲意圖分股竄擾已屬顯然浦口有武慶在彼駐守疊經擊退賊船掣獲奸細防堵尙屬認真奏入

上命軍機大臣傳諭琦善陳金綬雷以誠福濟曰現在  
瓜州之賊與鎮江聯作一氣並據奸細及所獲僞總  
帥各供有添集賊黨來揚接應並由北岸竄擾之說  
急宜嚴防北竄該大臣續派瞿騰龍赴三汊河協剿  
復派薩炳阿馳往儀徵修築港壩收集船隻木簕陸  
路施家橋派有張翊國駐守布置似尙周妥惟瞬屆  
月餘雖獲有勝仗而克復仍無把握該大臣等清夜

捫心能無自愧

琦善陳金綬雷以誠又奏言查揚城四面西北皆有重濠東南濱臨運河臣等因隔河難於兼顧是以臣琦善紮營北面臣陳金綬紮營西面東面缺口東門係署揚州營參將馮景尼等帶勇攻打東北則由福濟派總兵多隆武等駐紮防剿其城之東南經慧成派熱河兵四百名駐

守惟舊南門與西北陸路可通臣琦善派撥黑龍江馬隊四百名陝安官兵五百七十名分駐蔣王廟一帶杜賊西竄之路又先後撥兵一千八百名駐紮三汊河以遏南面瓜州揚城水路之往來臣雷以誠駐紮萬福橋防揚城東北而賊匪避匿堅城時時縋城而下見兵卽退惟南路雖有三汊河蔣王廟兩處官兵互爲聲援而



瓜州之賊尙有陸路可至揚城潛來接應自鎮  
江營盤被焚後艇船勢孤不能駛近瓜州以致  
瓜州鎮江之賊聯爲一氣迨虹橋兵勇接仗失  
利並民勇亦多潰散臣等詳加探訪僉稱虹橋  
偏近瓜州葦港叢雜爲奸宄嘯聚之區如撥兵  
前往非二三千人難以抵禦此時兵數無多實  
在不敷分撥況城堅賊衆防守益嚴其西北南

三面進攻均未得手總由阻隔運河敵攻綦難  
卽使轟毀城垣而搭橋豎梯之閒賊匪已有準  
備其不隔運河之處亦有城濠城內各有土坡  
一時難以攻陷且該逆連日於便益門東關西  
門等處縋城搭橋其意似圖竄逸又須防瓜州  
之賊前來接應各營官兵數月以來多在近城  
處埋伏駐營者甚屬寥寥目覩艱虞萬分焦灼

琦善陳金綬雷以誠又奏言六合儀徵爲揚州西南衝衢又在鎮江瓜州之北岸自須防其上竄業經疊飭認真堵截惟浦口與江甯之下關緊對現有武慶等在彼防守止能防江甯以下之賊船潛登北岸設賊船自江甯以上由和州太平等處上竄皖豫則江面無阻處處可以登岸現在賊由江面上竄擾及無爲州安知非乘

虛窺伺以圖接濟北竄之賊如由和州烏江鎮  
北行卽至浦口亦可直達滁州之清流關該處  
地形最爲扼要前經周天爵留撥西安馬隊並  
固原官兵在正陽關防守已經勝保帶往豫省  
其另調防之步隊四五百名尙未見到侍衛容  
照所帶吉林官兵由徐州折回清江已馳赴北  
路歸恩華統帶臣等惟就現在兵力進攻揚城

聞

以勦爲防奏入均報

同日恩華奏言臣馳抵懷慶府清化鎮軍營所  
領馬隊及直隸各營兵弁統計不滿六千復留  
馬隊五百名交副都統特爾卿額於修武等處  
駐紮兵力殊難再分適李億統帶兵勇二千餘  
名駐紮清化鎮及二十里鋪將軍托明阿提督

善祿現在府城正東安營內閣學士勝保現在  
府城東南安營山西太原鎮總兵烏勒欣泰亦  
統兵至懷慶城西北駐紮接懷慶府知府余炳  
燾等遣人縋城稟稱府城自初三日被圍迄今  
兩旬有餘城西角被賊用地雷轟擊一次東南  
角轟擊二次俱經搶護得完惟城內糧食僅敷  
數日雖民壯萬人嬰城固守勢甚危急並稱現

在府城東北兩門賊匪約各有一二千人南門  
不過千餘西門不過數百人等語臣現定於二  
十七日會齊各處官兵四路分投進剿已先密  
行移知托明阿善祿勝保李德等處各由府城  
正東東南正北三路同於是日平明進兵復飭  
知董占元會同烏勒欣泰於是日由西北路攻  
剿臣親同侍衛蘊秀等督率大隊直前攻剿總

期四路堦撿一鼓掃蕩奏入

上命軍機大臣傳諭訥爾經額恩華托明阿勝保李德  
曰賊營偏近懷慶城垣四圍周而知我大軍踵至勢  
必併力急攻希冀入城踞爲巢穴此時惟有速飭各  
路官兵合力進剿速解郡城之圍行軍期約最關緊  
要稍有參差便恐誤事儻機事不密爲賊暗防或意  
見不同致失期會皆於大局甚有關係該大臣等統



領諸軍同心合力密籌速辦務將懷慶一股賊匪立  
卽殲擒淨盡肅清河北惟諸臣之功若遷延時日郡  
城或有疏虞以致震驚畿輔該大臣等自問當得何  
罪爾等同辦一事尤貴以大局爲要和衷乃克有濟  
豫省軍營距京甚近朕無難隨時訪聞至軍情變幻  
旦夕不同惟在諸臣相機速辦和衷共濟朕亦不爲  
遙制

同日山西巡撫哈芬奏言查總兵烏勒欣泰督同遊擊和昌等共帶兵出太行山隘口距懷慶三十里紮營進剿臣於六月十七日出省行抵祁縣次日至長子縣距潞安府城僅五十里撥兵三千名進剿太行山最爲緊要臣擬改赴澤州府在太行山前駐紮以扼賊北竄之路如賊西竄臣卽赴垣曲一帶迎剿奏入

上命軍機大臣傳諭哈芬曰總兵烏勒欣泰等帶兵出太行山隘口紮營進剿該撫已行抵祁縣因防堵兵單擬赴澤州在太行山前駐紮以扼賊北竄之路惟該總兵所帶之兵齊赴懷慶後路有無接應不可不加意布置前調陝西兵二千餘名由蒲州取道計已馳入晉境著卽催令前進以扼太行要隘兼可爲懷慶接應

初二日乙巳兵部尙書桂良奏言查目前防堵情

形以河北清化鎮爲最重次則入直之臨洺關  
再次則正定府清化臨洺二路俱有大軍駐守  
正定勢居後勁距保定府城較近且與山西接  
壤地方甚多不得不豫爲籌防前因兵力不敷  
派撥當經咨商請爾經額設法籌調茲准該大  
臣咨覆亦以現在懷慶被圍賊匪如竄入太行

山擾及山西正定府屬要隘均須設防將所謂  
山西大同鎮三四起官兵一千名截留正定防  
守其五六起一千名飭留於保定省城與臣意  
見相同俟大同鎮後起官兵到省臣卽令山西  
帶領後二起官兵之署副將穆騰額在省駐紮  
仍遵

旨派署提督保恆前往正定擇要防堵以爲後路聲援

至省城爲畿輔重地臣當隨時巡防彈壓其附郭四周地曠人稀面面皆可繞越亦經委員各處偵緝分投堵截如兵力不敷調遣卽於天津駐紮之

盛京步隊內酌調數百名以資捍禦奏入得

旨允行

同日

上諭內閣曰前任山東布政使劉源額著仍留於山東  
督同地方紳士辦理團練事宜

初四日丁未 諭爾經額托明阿奏言查本月二十

三日內閣學士勝保督兵趕到 臣等遂商定合

兵一處分路進剿勝保攻其東南面 臣托明阿

與提督善祿都統西凌阿攻其東北兩面該逆

仍前堅守我兵奮勇進剿始分股出拒我兵施

放連環槍礮斃賊數百名其沁隄以北涉水接  
應之賊連撲數次均被我兵截殺數十名次日  
復分投進攻擒斬甚多另有騎馬紅衣賊目在  
河北率賊多人欲來接應經勝保督放大礮擊  
斃餘匪逃匿二十七日勝保攻其南面臣托明  
阿與善祿等分攻東北兩面又斃賊三四百名  
正在商議收隊該逆於東南北各路及田禾內



突出因時當黑夜馬隊未能擊壓經臣托明阿督率官兵列定陣式槍礮並施一時之久將該逆擊退斃賊約數百名仍當會合各路官軍設法勦辦以期迅掃賊氛

同日勝保奏言臣於六月二十三日在懷慶東關外距城六里之申趙地方紮營次日與托明阿善祿西凌阿等晤商機宜以臣所帶兵勇較

爲得力囑令攻打前敵自二十五至一十七日  
連次獲勝統計各路斬擒逆匪約二三千名現  
在賊勢已窮而壁壘甚固懷慶城內望援甚急  
臣等惟有設法勦辦以期速解城圍

勝保又奏言現在賊勢已窮惟恐分竄懷慶東  
北兵力較厚似可堵禦西南孟縣濟源等處在  
所必擾必得分兵於崇義鎮駐紮遏賊竄路兼

可藉作聲援其溫孟榮澤等縣河干渡船已與  
河臣長臻會商並派弁持令認真稽查無論官  
民船隻均連夜放赴柳園口下游停泊以免賊  
匪乘隙南渡據盤獲奸細供稱逆首僞丞相林  
鳳詳志在四面圍困待懷慶城中糧盡斷無難  
破等語臣伏思此城關繫甚重萬一有失又成  
負隅之勢且南賊更恐復張擬設法用計早破

賊壘與城內聲息相通則危城可保臣查各路官兵之稱勁旅者不過於距賊二百步外以槍礮轟擊迫賊礮一發賊旗一動遂多不敢前衝專恃槍礮安能破壘捻渠故以之勝賊尙易以之滅賊實難至黑龍江馬隊之槍箭雖稱勁旅不如吉林兵鳥槍於截勦追殺更爲得力現聞吉林馬隊已到沁河之北如蒙

天恩賞撥四五百名與臣軍步隊相輔而行更易著手均奏入

上命軍機大臣傳諭訥爾經額恩華托明阿勝保李德  
曰據訥爾經額等奏連日獲勝情形賊勢已漸窮蹙  
府城當可解圍惟連日接仗皆係托明阿勝保善祿  
所帶官兵其攻破賊營及勦殺賊匪皆在迤東一面  
該處賊匪固較西北兩面爲多但由一路進兵並未

四面合剿前次董占元等所獲勝仗皆近在丹河南  
北中間尙隔沁河未能直逼賊壘懷慶孤城究乏切  
近援應此時托明阿勝保善祿等已破賊營兩座斬  
獲甚衆而各營盤或距城十餘里遠者至三十里仍  
屬鞭長莫及援兵雖衆尙未能與城內聲息相通仍  
不足恃著誥爾經額卽飭所派董占元花里雅遜布  
等與恩華李德迅卽移營前進合力攻剿總以速渡

沁河緊逼賊營爲力解重圍之計其南通孟縣西通  
濟源之路均關緊要哈芬所派烏勒欣泰管帶之兵  
聞已出太行山口但恐該省官兵仍形單弱勝保所  
請分兵駐紮崇義鎮自係扼要妥籌著該大臣等卽  
行酌量分撥儘進剿之兵一時不敷調遣其現駐臨  
洺關及該大臣隨營之兵均可移遠就近前路多一  
得力之兵卽後路省一分防堵之力董占元前此接

仗雖有斬獲輒以礮熱收隊連日以來並未見其接  
戰花里雅遜布現署河北鎮責無旁貸何以亦未奮  
力進攻均不可解朕聞各路官兵素稱勁旅者不過  
於距賊二百步外以槍礮轟擊不敢前衝勁旅若此  
其他可知吉林官兵素習鳥槍頗稱得力著恩華卽  
行前進若能與勝保合隊甚好若勢難併隊亦可照  
勝保所請撥五百名迅交勝保統帶與綠營步隊相



輔進勦仍當與勝保營壘相接互爲應援

上諭內閣曰此次攻勦懷慶賊匪連日大勝托明阿勝保協力同心奮勇督勦辦理甚合機宜深堪嘉獎勝保著卽幫辦河北軍務與恩華李德及董占元等各路精兵會齊進勦立解城圍同膺懋賞

同日刑部右侍郎雷以誠奏言本月十五日虹橋失利賊由瓜州徑達虹橋與揚城賊匪聲勢

相聯儻兩路約齊東竄則仙女廟斷難抵禦仙  
女廟有失則下河州縣盡成糜爛之區米糧貲  
財全爲賊有而淮安清河又將不戰自危因商  
之琦善卽派張翊國帶勇數百名在施家橋近  
北之褚家壩紮營以圖收復虹橋又查錢家灣  
常家馬頭等處直通瓜州江口若賊匪乘舟而  
下東北可抵仙女廟北可抵萬福橋較之陸路

尤爲喫重現今張翊國等督率紳民處處截堵以防賊船東竄仍分勇前往該二處及李墅河嚴家橋等處協同民勇實力巡防惟臣萬福橋營中存勇不足千人實屬不敷調遣竊計前此北竄之賊現已漸就殲除合無仰懇

聖恩飭令前赴豫省之兵毋論何路酌撥二三千名迅卽折回揚州歸臣調遣但得兵勇合力非特保

衛下河兼可協同攻剿奏入

上命軍機大臣傳諭琦善陳金綬雷以誠福濟曰瓜揚  
協剿兵力不敷前已疊降諭旨令琦善等將慧成容  
照所帶官兵截留以備調撥著琦善飛催慧成並容  
照所帶各兵酌量布置以資防剿雷以誠軍營與福  
濟相距不遠正可互爲聲援俟懷慶賊匪悉數殲除  
當再撥兵赴瓜揚一帶協剿

初五日戊申琦善陳金綬雷以誠奏言本月二十

七日揚郡之賊由東關便益兩門竄出數百人  
經署參將馮景尼等帶兵迎擊餘匪退入城內  
臣雷以誠派員帶勇於是日往徐凝門一帶防  
剿適有賊匪數百名縋城而下當經擊退二十  
八日巳刻天甯門城內賊匪突出百餘人經巡  
防弁兵迎擊該逆復自北門竄出數百人搭橋

渡河各處埋伏官兵用礮轟打殲斃多名臣陳  
金綬派參將鞠殿華等帶兵迎擊該匪蠡擁而  
至正攻勦間復有賊匪千餘人由西門城上縋  
下直撲雙橋意欲抄襲我兵之後適署都司夏  
九章帶兵接應卽由雙橋迎擊該匪又分兩股  
抄襲官兵亦分隊截擊統計兩路斃匪三百餘  
名是日黎明署參將馮景尼師長鑣在東關缺

日便益諸門防堵亦有賊匪百餘人縋下兵勇  
向前攻擊臬司查文經亦撥兵援應轟斃賊匪  
數十名又經臣雷以誠委員帶勇在東關外一  
帶攻勦殺賊多名餘匪俱退入城內次日卯刻  
賊匪突由南門擁出千餘人適孫得富帶勇迎  
敵刺斃賊目多名餘匪仍行退回臣琦善訪聞  
瓜州賊匪有欲結筏乘潮於七月初二三日

三汊河報復之說恐揚城賊匪聞信突出夾攻  
南路兵單必至腹背受敵密飭總兵瞿騰龍帶  
領弁兵馳赴南門外防守並由三汊河過渡繞  
至南門東岸嚴密巡查

琦善陳金綬雷以誠又奏言查賊匪竄至江南  
占踞三城又分遣黨與南北滋擾其賊首及大  
頭目均在三城之內賊船來往江面飄忽靡常



有劇賊爲之主謀有奸匪爲之勾結江北一帶該匪竄伺已久誠如

聖諭總以北扼淮徐廬鳳爲要查北岸皖境各州縣濱臨大江者甚多縱不能處處設防亦當擇要扼守聞和州鍼魚嘴江口五月間已有匪船停泊登岸搶劫之事至今無兵可撥地勢孤懸上下難於接應似宜於該州所屬之烏江地方撥兵

防守該處距州城六十里距浦口一百里聲勢  
尙可聯絡又如滁州之清流關及淮安之清江  
浦本有防兵皆爲勝保調往豫省藩籬竟撤殊  
切隱憂現已知照容照督帶官兵折回清江浦  
以資扼守並擬商慧成將所帶山東青州兵一  
千名以五百名駐和州之烏江以五百名協防  
浦口並將直隸宣化鎮兵五百名移紮六合陝

西潼關大慶關兵四百五十名移紮儀徵庶於  
北岸江防稍爲周密

琦善陳金綬雷以誠又奏言據探稱有該逆大  
船七隻小船十一隻駛至北岸塔東柳樹壩地  
方停泊意欲登岸鑾儀使武慶聞信卽會同副  
都統開隆阿等統帶馬步官兵一千名整隊迎  
擊武慶等帶領馬隊三百名先將登岸之賊殲

斃五十餘名餘匪回船糾衆抗拒武慶等將馬步隊會合一處奮力攻勦忽見南岸賊船四十餘隻揚帆開礮駛近北岸官兵分隊迎勦先擊其赴援之船該逆卽竄回南岸不敢復圖援救經官兵殲斃多名生擒三十七名均係廣西湖南賊匪內有僞將軍一名僞總指揮二名所有該賊匪大小船隻全行燒燬查浦口對峙金陵

爲北岸要隘逆賊時存窺伺仍令各軍嚴行防守奏入

上命軍機大臣傳諭琦善陳金綬雷以誠福濟曰揚城賊匪分路衝突經官兵分隊擊敗斬獲甚多瓜州賊匪有至三汊河報復之說恐揚城之賊突出夾攻已飭羅騰龍帶領弁兵馳赴南門外防守並由三汊河繞至南門東岸嚴密巡查自應如此布置著琦善陳

金綬會同雷以誠福濟等妥籌協勦合力進攻務將揚城之賊悉數殲除斷不可再令竄出慧成容照所帶官兵計可先後趕到著卽隨時擇要調撥俾得互相策應切勿以有用之兵置之無用之地其浦口逆船仍飭令開隆阿武慶西昌阿伊興額等迅速進勦以期江路肅清

同日山東道監察御史方俊奏言已革兩江總

督陸建瀛奉

命爲欽差大臣赴九江上游迎剿賊匪聞總兵恩長失利既不奮往應援又不嚴行防禦隻身遁回金陵所齎軍餉銅礮悉以委賊自該革督九江一逃而小孤山防守之兵安慶防守之兵與夫沿江防守之兵無不潰逃逃兵散布謠言稱賊利害各處土匪因而四起賊乘其勢由楚破皖旬

日間直抵金陵用我軍餉買我奸細用我槍礮  
攻我城垣由是金陵鎮江揚州相繼被陷至今  
未能收復且致河南江西俱被賊害是其誤國  
之罪大矣自逃兵散而沿途搶劫自土匪起而  
各處搶劫加以焚燒殺戮不知戕我生靈若干  
萬是其殃民之罪大矣向使該革督在九江不  
走但能力拒一二日則向榮趕到賊必不能東



竄向使該革督不能禦於九江而退守小孤山  
則向榮趕到賊必不能過安慶向使該革督一  
回金陵卽與祥厚等協力同心籌固防守賊亦  
不得遽行破城乃始則閉門三日不出繼則挾  
祥厚等糾衆之恨守城事宜在在與爲掣肘致  
祥厚等徒抱忠忱僅能激勵駐防盡節以死是  
恩長祥厚霍隆武之死死於陸建瀛也江安數

百萬士民之死死於陸建瀛也昨者江甯死事  
諸臣祥厚霍隆武祁宿藻等渥膺

恩賞並奉

諭旨陸建瀛於十廟地方遇賊被害該革員雖經失律  
於前尙不失城亡與亡之義陸建瀛著賞還總督銜  
卽照總督例賜卹臣愚以爲該革員如無前此九江  
之逃而登陴誓守城破自裁則爲城亡與亡該

革員如與賊決戰臨陣捐軀亦可爲城亡與亡  
今於十廟遇賊爲賊所殺是欲逃而無可逃不  
得附於城亡與亡之義也該革督九江一逃關  
繫天下大局誤國殃民莫此爲甚生無可貸死  
有餘慚我

皇上寬其已往憫其一死

賞還總督銜並前此查抄之家產已屬至優若復與死

事諸臣同邀

恩卹恐無以服天下之心勵行閒之士氣而慰恩長  
祥厚霍隆武等忠魂於地下奏入

上諭內閣曰已故兩江總督陸建瀛前因喪師失律革  
職拏問嗣因其於城破時遇賊被害尙非忍辱偷生  
是以仍加恩卹茲據該御史奏稱該督自九江逃回  
關繫天下大局祥厚霍隆武之死慘烈可矜江安數

百萬生靈遭茲荼毒皆由陸建瀛一人所致請撤銷  
卹典等語所奏自屬公論陸建瀛業經賞還總督銜  
復將原抄家產給還已足示朕法外施仁之意著毋  
庸另議卹典以昭區別

初六日己酉張亮基奏言查逆賊分股竄擾河南

之新鄭許州一帶土匪捻匪處處勾結有取道  
西平直偃信陽州之謠該處爲楚豫衝途信陽

有警則湖北之隨州應山孝感一帶處處宜防而應山之黃土平靖武勝三關爲自古南北有事必爭之地所謂義陽三關也臣已札調官兵一千七百餘名交前湖北藩司唐樹義統領於十七日馳赴該處扼堵並委知縣許廣藻主事胡大任隨同前往勸諭各處紳團互相聯絡彼此策應以輔兵力之不足又襄陽北控宛洛南

蔽江淮形勢衝要臣稔知署臬司羅遵殿前在  
安襄鄖荆道任內甚有惠政卽委該署司帶印  
馳赴襄陽號召鄉團勉以忠義所有提標將弁  
兵丁俱由該署司調遣以備不虞奏入

上命軍機大臣傳諭張亮基崇綸曰本日據張亮基奏  
稱逆匪分竄新鄭許州一帶該署督已調官兵馳赴  
三關等處扼要堵剿並分委官紳勸諭團練以爲策

應又委羅遵殿馳赴襄陽防堵均著照議辦理惟豫省大兵均在河北其黃河以南兵力實形單弱現在各處匪徒竊發更恐滋蔓難圖該署督務當嚴飭交界防堵各員越境迎剿毋得徒事株守如楚北兵勇有可分撥豫省之處卽著迅派馳往協剿

同日福濟奏言本月二十四日賊由便益門潛出數百人偷搭浮橋飭令署參將馮景尼乘夜



前往拆毀橋身該逆下城救護兵勇施放槍礮  
卽退入城復據參將師長鑣稟稱二十六日戊  
刻賊匪復出城約七八百人意在偷渡城河當  
卽率領弁兵奮擊賊匪死者甚衆紛紛退避入  
城臣所帶得力兵勇爲數無多節經調撥分防  
勞極單薄前添調安徽壽春鎮標兵一千二百  
名尙未見到惟有懇

恩迅飭挑選來揚臣仍一面會同琦善等相機攻剿奏  
入

上命軍機大臣傳諭福濟曰壽春鎮標兵現在安徽防  
剿正當喫緊之際恐難抽撥慧成容照所帶之兵現  
已有旨令其折回不日均可趕到著福濟卽與琦善  
等隨時酌量辦理該漕督與琦善等圍攻揚州同辦  
一事所有剿賊情形卽可聯銜奏報以免重複

同日張芾奏言查該逆自受懲創後未敢大隊攻城惟藏匿屋內鑿孔施放槍礮仍以零股四出窺探臬司江忠源督飭員弁開放大礮擊毀賊壘數處又於城內開挖暗濠以杜地道現在總兵馬濟美趕到卽帶兵督同參將羅玉斌等與新募川勇紮營城東北永和門外又有都司戴文蘭等分別帶勇紮營俾候兵力稍集設法

進攻惟該逆被勦他竄我軍若無舟楫不能追擊必須下游戰船溯流而上方可夾攻此次向榮派已革提督福興等追賊該革員豈不知向繼雄礮船失事乃行至蕪湖遂卽返棹其實賊匪多未上岸自係乘風直上且瀕江殘破之餘已無可掠福興率稟向榮以難民船隻粉飾入奏以致賊愈蔓延言之殊堪憤恨

張芾又奏言查六月十一日戴文蘭等下城紮營該逆突出數百人冒死來撲經該員等督飭兵勇擊斃賊數十名十二日戴文蘭等正在支搭帳房該逆又來一二千人分作五路直撲營盤當經戴文蘭督帶開化勇前赴迎擊張金甲督帶辰州兵設伏於短牆下開化勇佯退誘敵辰州兵突出衝截開化勇復從旁環擊共傷斃

賊匪一百餘名十四日臣派總兵馬濟美統兵由東而北都司戴文蘭由西而北在得勝門外北面空心礮臺後駐紮俱於十五日卯刻出隊總兵馬濟美督同參將羅玉斌等由東路進攻城北賊營該逆數千人蠶擁迎拒廣勇首先衝鋒川勇與鎮標兵繼之三面環擊鏖戰兩時斃賊無數其派在空心礮臺策應之廣勇練勇人

數較少甫經排隊該逆數百人徑來攻撲廣勇  
頭日程智泉奮勇向前抵禦練勇幫同接應空  
心礮臺內亦同時開礮相護賊衆始退臣與臣  
陳孚恩督同江忠源司道等一同在城上照料  
並令知府耆齡遊擊祥麟及各弁兵開放大礮  
斃賊多名都司戴文蘭等由西路進攻城西賊  
營賊匪突出三百餘人經兵勇擊退伏匿不出

惟該逆萬餘脅從者雖多而死黨亦復不少雖經官兵擊敗臨陣並不潰散現在張亮基所撥兵勇已到向榮派總兵音德布帶兵一千二百名駱秉章派兵六百名贛州總兵阿隆阿帶兵三百餘名均陸續來到臣等擬於永和章江兩門紮營爲左右二翼東南四門距賊稍遠防守較易奏入



上命軍機大臣傳諭張芾陳孚恩江忠源曰賊匪窺探  
省垣經江忠源督飭員弁開放大礮擊毀賊壘數處  
又經總兵馬濟美等兩路夾攻大挫兇鋒現議於永  
和章江門外紮營爲左右二翼逼近賊營著卽趕緊  
設法勦辦東南四門雖距賊稍遠防守較易仍當督  
率文武員弁不可稍存大意至江西攻城之賊是否  
係金陵逆首分股遣來其頭目果係何人拏獲奸細

時詳細訊供具奏

上又命軍機大臣傳諭向榮曰據張芾奏逆匪上竄時  
不過數千人向繼雄旣以無援而敗福興又復縱賊  
不追賊遂沿途裹脅勢益猖獗已革提督福興經該  
大臣派往追賊何以行至蕪湖遽爾返棹不與向繼  
雄夾擊且何以前次該大臣奏稱係難民船隻是否  
該革員捏詞具稟著向榮確切查明據實具奏

張芾又奏言查各省奉撥江南大營軍餉均應解赴江西省城總局兌收轉解茲查廣西陸續解到軍餉銀四十萬餘兩業已委解大營糧臺銀三十三萬餘兩現存銀七萬兩又福建解到銀十萬兩均存司庫因大營糧臺六月分餉銀已敷支放且現在賊圍路梗未能起解業經咨明向榮查照又廣東委員謝奎領解銀七萬七

千兩已准廣東督撫咨報起程現在未便令其  
解省致有疏虞業經飭令贛南道截留應俟省  
城解嚴江路肅清再行飭令起解

同日署湖南巡撫駱秉章前禮部右侍郎曾國  
藩奏言查逆匪竄撲江西省城望援甚切勢難  
久待稔知湖北臬司江忠源籍隸寶慶府屬之  
新甯縣素爲鄉人所服當經札飭署寶慶府知

府魁聯督同江忠源胞弟江忠淑並署湘鄉縣知縣朱孫詒招募湘鄉及新甯等縣壯勇三千名來省飭委前署鹽法道夏廷樾及朱孫詒江忠淑等全數管帶先赴江省援剿已陸續起程前進臣等復於省城調到各營兵內抽撥鎮筸兵二百名乾州九谿等營兵三百名辰沅道標兵一百名暫交夏廷樾管帶赴江俟孫漢煥到

日卽飭令前往統帶合計先到江省之辰州兵  
已符八百之數並湘鄉等處練勇概交江忠源  
調遣計前後派往兵勇三千八百名均係南省  
勁旅足資援剿均奏入報